

СЛУЖБА ПРАВЕДНОЙ СОФИИ, КНЯГИНЕ СЛУЦКОЙ
(текст службы праведной Софии, княгине Слуцкой утвержден
решением Священного Синода Русской Православной Церкви
от 25-26 декабря 2013 года (журнал № 146))

*Память праведной Софии, княгини Слуцкой празднуется 1 апреля (по новому стилю) / 19
марта (по старому стилю)*

НА ВЕЛИЦЕЙ ВЕЧЕРНИ

Блажен муж: 1-й антифон. На Господи, воззвах: стихиры, глас 8:

Богоблаженная честная княгине Софие, милование ко искреннему и любовь яже к Богу стяжала еси, сего ради благодать Божия обильно на тебе, мати, пребысть. Темже молитвами твоими сохрани верою блажащия тя.

Мощи твоя благодатию Божиею слепым прозрение источают и подают исцеление всем, приходящим с верою и просящим посещения твоего, мати досточудная Софие, града Слуцка похвало и всея земли Белорусския украшение. Темже молитвами твоими испроси нам велию милость.

Блаженная Софие богомудрая, предстоящи с небожителю Престолу Владыки и Господа, непрестанно молишися о нас и ходатайствуеши о всех, притекающих к тебе с верою и любовию. Темже, яко неусыпну молитвенницу и теплую заступницу, тя почитаем вси, предивная.

Блаженная Софие, богато добродетельми украсилася еси в жизни временней, смирением, кротостию, трудолюбием и нестяжательностию. Темже, яко исполнену бывшу на земли великих дарований Божиих, ублажаем тя вси, предивная.

О, блаженная праведная Софие! От юных лет сосуд избранный яви тя Господь, стоянием в вере Православней, терпением, молитвою, милостынею, чистотою душевною и телесною. Темже Небесному Царю и Владыце всех угодила еси, Емуже ныне молишися даровати нам мир и велию милость.

Всяк язык да подвижится к благохвалению преславныя матере нашея Софии: юноши же и девы, супруги и вдовицы, Христову угодницу и праведницу похвалами величаим, ревностно бо потрудившися и слабость женскую отвергши, милостынею и храмозданием благолепие земли Слуцкия умножила ест. И, пресветлым Небесным венцем украсившися, просит у Христа Бога Церкви единомыслие и мирови мир, и душам нашим велию милость.

Слава, глас тойже:

Болезни терпящи, прияла еси благодать недуги душевныя и телесныя исцеляти, мати честная Софие, и духи нечистыя молитвами прогоняти, всем же скорбящим пред Богом предстательствовати. Сего ради испроси исцеления нам и велия милости.

И ныне, Богородичен: Царь Небесный:

**Вход. Прокимен дне. Чтения три.
Премудрости Соломоновы чтение (глава 3):**

Праведных души в руке Божией, и не прикоснется их мука. Непщевани быша во очесех безумных умерти, и вменися озлобление исход их: и еже от нас шествие – сокрушение, они же суть в мире. Ибо пред лицом человеческим, аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему. Яко благодать и милость в преподобных Его и посещение во избранных Его.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Приимет щит непобедимый преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят, и от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии концев земли. Внушите держащии множества и гордящиися о народех язык, яко дана есть от Господа держава вам и сила от Вышняго.

Премудрости Соломоновы чтение (глава 4):

Праведник же аще постигнет скончатися, в покои будет. Старость бо честна не многолетна, ниже в числе лет изчитается. Седина же есть мудрость человеком, и возраст старости житие нескверно. Благоугоден Богови быв, возлюблен бысть, и живой посреде грешник преставлен бысть: восхищен бысть, да не злоба изменит разума его, или лесьть прельстит душу его. Рачение бо злобы помрачает добрая, и парение похоти пременяет ум незлобив. Скончався в мале исполни лета долга: угодна бо бе Господеви душа его, сего ради потщася от среды лукавствия; людие же видевшие и не разумевшие, ниже положше в помышлении таковое, яко благодать и милость в преподобных Его и посещение во избранных Его.

На литии стихира, глас 8:

Достохвальная и блаженная Софие, честнаго корене порождение свято, премудрости соименна еси, благими делы украсилася еси, милостынями, чистотою и правдою сосуд Святаго Духа была еси. Имже действуеши преславная чудеса, верою приходящим к раце мощей твоих, и молишися о душах наших.

Слава, и ныне, Богородичен:

Храм и дверь еси, палата и престол Царев, Дево Всечестная, Еюже Избавитель мой, Христос Господь, во тьме спящим явися, Солнце Сый правды, просветити хотя, яже созда по

образу Своему рукою Своею, темже, Всепетая, яко матернее дерзновение к Нему стяжавшая, непрестанно моли спастися душам нашим.

На стиховне стихиры, глас 1:

Славы отцев воистинну возжелавши, веру православную возлюбила еси, темже отступльши нечестивых, житием твоим Богу усердно послужила еси, Софии Богомудрая, и ныне на небесех приемлещи мзду, со Христом царствующи.

Стих: Честна пред Господем смерть преподобных Его.

В пристанище Божественное устремившись, прешла еси волны мирских мятежей: и души своя корабль, всечестная, невредимь от потопления греховнаго сохранила еси.

Стих: Дивен Бог во святых Своих, Бог Израилев.

Рака мощей твоих, блаженная княгине Софии, якоже сокровище честное явися, юже обстояще, исцеление недугом нашим молитвами твоими приемлем.

Слава, глас 6:

Возсия днесь солнца светлейше, священное твое торжество, Софии праведная, земли Слущкия похвало, сущим во тме души озаряющее, мрак же бесовский всегда отгоняющее, досточудная.

И ныне, Богородичен:

Богородице, Ты еси лоза истинная, возрадившая нам Плод живота. Тебе молимся: молися, Владычице, со святыми апостолы, помилувати души наша.

Тропарь, глас 5:

Святая праведная мати Софии, нетлением мощей и чудес сиянием почти ты Бог; и мы, поминающе твое праведное житие, молим тя испросити телесем нашим здравие и душам спасение.

Слава, и ныне, Богородичен:

Радуйся, двере Господня непроходимая; радуйся, стено и покрове притекающих к Тебе; радуйся, необуреваемое пристанище и Неискусобрачная, рождающая плотию Творца Твоего и Бога, молящи не оскудевай о воспевающих и кланяющихся Рождеству Твоему.

НА УТРЕНИ

На Бог Господь: тропарь тойже.

По 1-м стихословии седален, глас 5:

Мужески подвиги воздержанием претерпевши, низложила еси многокозненнаго и, в терпении поживши благочестно, праведная Софии княгине Слущкая, ныне прешла еси к Богу, молящи о совершающих священное твое торжество. *(Дважды)*.

Слава, и ныне, Богородичен:

Всепорочная Мати, возсияй ми покаяния лучу и, разоривши мрак безмерных моих зол, лукавья отжени, Дево, помыслы сердца моего.

По 2-м стихословии седален, глас 2:

Се рака даров благодатных, се источник целебный, святая показашася мощи, темже, приидите, вернии, усердно почерпнем ныне: болящия - исцеления и иже во скорбех – радости. Молитвами блаженныя Софии Слуцкия, Господи, Церковь нашу нерушиму сохрани.

Слава, и ныне: Преблагословенна еси:

Величание

Величаем тя, святая праведная княгине Софии, и чтим святую память твою: ты бо молиши за нас Христа Бога нашего.

Псалом избранный:

Терпя потерпех Господа, и внят ми, и услыша молитву мою. Постави на камени нозе мои, и исправи стопы моя.

По полиелеи седален, глас 8:

Предъизбранная от Бога, праведная Софии, ко пристанищу жизни наставляема, жития бурю претекла еси. И ныне со ангелы песнословящи Избавителя, моли непрестанно о нас, яко да благодать и милость обрящем у Христа, Бога нашего. *(Дважды)*.

Слава, и ныне, Богородичен:

Радуйся, ангелом радость мира приемшая. Радуйся, рождающая Творца Твоего и Господа. Радуйся, сподобльшаяся быти Мати Божия.

Степенна, 1-й антифон 4-го гласа. Прокимен, глас 4: Дивен Бог во святых своих,/ Бог Израилев. **Стих:** В церквах благословите Бога, Господа от источник израилевых. **Всякое дыхание: Евангелие от Матфея, зачало 104.**

По 50-м псалме стихира, глас 6:

Возсия днесь солнца светлейше, священное твое торжество, Софии праведная, земли Слуцкия похвало, сущим во тме души озаряющее, мрак же бесовский всегда отгоняющее, досточудная.

Канон, глас 8.

Песнь 1

Ирмос: Колесницегонителя фараона погрузи, чудотворяй иногда Моисейский жезл, крестообразно поразив, и разделив море: Израиля же беглеца пешеходца спасе, песнь Богови

воспевающа.

Страстными бурями всюду погружаем, и помышлении греховными колеблему, ко пристанищу тихому Христовых заповедей, молитвами твоими, праведная Софие, мя направи, да достойно тя воспою.

Божественными добротами просвещена, Богоблаженная Софие, Слову Превечному уневестила еси, поживши богоугодне, и Того живоносным стопам последовала еси, веру Православную житием твоим утверждаючи.

Божественных отец наказанию последовала еси, славная Софие, и сих нраву чисте поревновала еси, по закону Божию праведно поживши, добрыми делы Богу угодивши, Богомудрая, и истинным смирением.

Богородичен: Божественную стамну и трапезу, Хлеб животный понесшую, неделанную ниву, гору святую, Богородицу Деву песнями прославим.

Песнь 3

Ирмос: Небеснаго круга Верхотворче Господи, и Церкви Зиждителю, Ты мене утверди в любви Твоей, желаний краю, верных утверждение, едине Человеколюбче.

В небесныя чертоги светозарныя вселившись, исцеления нам реки источаеши, премудрая Софие, страстная течения изсушаючи.

Украсилася еси желанием крайним, желаючи Христа, премножеством благосердия плотию обнищавшаго, и последовала еси животным Его словесем, житейская вся красная возненавидевши.

Позлащенне криле добродетели стяжавши, на высоту небесную возлетела еси, блаженная Софие, яко голубица непорочная.

Богородичен: Род человеческий спасеся, Всенепорочная, всеславным Рождеством Твоим: темже чтим Тя, и благочестно ублажаем, Пречистая Дево Богорадованная.

Седален, глас 4:

Добротами божественными преукрашена и нетлением святых мощей твоих от Бога прославлена, праведная Софие, к Нему в нетленный чертог вошла еси, идеже молишия непрестанно спастися от всякия беды любовью тя почитающим.

Слава, и ныне, Богородичен:

Чистая, Всенепорочная и Неискусобрачная Дево, едина Безлетное Слово Божие в лето рождшая: Того со святыми и честными апостолы, мученики и пророки, и преподобными моли, даровати нам очищение и велию милость.

Песнь 4

Ирмос: Услышах Господи, смотрения Твоего таинство: разумех дела Твоя, и прославих

Твое Божество.

Светлое твое торжество, светом Духа Божия сияющее, озаряет души наша, верою поющих
тя, Софии праведная.

Чудеса божественными уверила еси неведущих Владыку Христа, и к познанию Того
обратила еси прелести тьму оставльших.

Дары Христу принесла еси, молитвы и труды воздержания: сего ради прияла еси Небесное
Царство, Софии, и вечнующее наслаждение.

Богородичен: Смиривши спаси мя, высокоумрием живушаго, рождаша Вознесшаго
смирившееся естество наше, Пречистая.

Песнь 5

Ирмос: Утреннююще вопием Ти, Господи, спаси ны: Ты бо еси Бог наш, разве Тебе иного
не вемы.

Рукама твоима преподобно воздвигаемыма к Зиждителю, мати Софии, вражия шатания
низложила еси.

Удержав руку твою десную Вышний, наставил тя есть, мати, к Небесному наслаждению.

Стезю тесную прошедши в житии твоём, к широте приспела еси райстей, Софии
всечестная.

Богородичен: Иже Богородицу Тя неведущии, Богомати, Света не имут видети Рождагося
из Тебе, Пречистая.

Песнь 6

Ирмос: Ризу мне подаждь светлу, одеяйся светом яко ризою, многомилостиве Христе Боже
наш.

Умртивши движания плотская, над страстьми вельми воцарилася еси, и ныне, всечистая
Софии, в безстрастных живещи светлостех.

Образу Спасову навекла еси поклоняться, славная, дела и словеса твоими спасительная
Его соблюдающи учения.

Облак ты Христос показа, мати Софии, дождь источающий животный верою притекающим
к тебе, преславная.

Богородичен: Красен паче всех человек Сын Твой, Пречистая, добротою Божества, аще и
плоть бысть нас ради.

Кондак, глас 4:

Приидите, вся русския жены, святую Софию восхвалим, уподобившуюся мудрым девам,

елей благодати Духа Святаго стяжавшим; темже умудри ю Господь подвизатися во утверждение Святыя Православныя веры и соблюдати Церковь Его незыблему от ересей и расколов, сего ради благодарне воспоем ей: радуйся, града Слуцка и всея земли нашея радости и утверждение.

Икос:

Струи мне слова даждь, Боже мой, и источник благочиния сотвори мой ум, и благослови язык мой, да воспоем угодницу Твою Софию Богомудрую, юже венчал еси благостию Твоею: аще бо Сам не даси ми слова достойнаго, како принесу дар, нищий сый, темже подаждь ми силу, исповедати ея подвиги, крепко бо звери мысленныя победила есть. Молитвами ея, Спасе, утверди и моя помышления.

Песнь 7

Ирмос: Отроцы еврейстии в пещи попраша пламень дерзновенно, и на росу огонь преложиша, вопиюще: благословен еси, Господи Боже, во веки.

О доброте тлеющей, Софии блаженная, zde небрегла еси, смотрящи тамо сущая воздаяния и свет, и славу Божию нестареющуюся и красоту, и Божественное селение.

Разум боголюбив стяжала еси, Софии, и, во плоти сущи, ангелом уподобилася еси, бдящи бодренно и любовию поющи: благословен еси, Господи Боже, во веки.

Богородичен: Виждь скорбь мою, Дево, юже ми наведе множество зол моих, и родства огненнаго исхити мя, вопиющаго: благословен еси, Господи Боже, во веки.

Песнь 8

Ирмос: Богоглаголивии отроцы в пещи со огнем пламень попирающе, пояху: благословите дела Господня Господа.

Украшена сиянием чистоты, и чистым житием просвещена, Софии Богомудрая, предстоиши Христу Богу нашему.

Болезни различныя врачует человек, и отгоняет бесовския напасти тело твое святое, в раце преславно хранимое.

Священная жертва принеслася еси, и приношение светлое, праведная княгине Софии, яко кадило благоуханное, всех Владыце Христу Богу нашему.

Богородичен: Без исления Слово паче словесе родила еси, тления всякаго нас избавляющаго: сего ради Тя, Дево, верою величаем.

Песнь 9

Ирмос: Устрашися всяк слух неизреченна Божия снисхождения, яко Вышний волею сниде даже и до плоти, от девического чрева быв человек. Темже Пречистую Богородицу вернии величаем.

Возжелела еси доброту мысленную Христову, и чисто возлюбила еси Его. Где почиваеши;

где ли пасеши; тепле вопияла еси: да почию у Тебе, и в Твоих светлостех наслаждуся, величаючи Твою благодать.

Разум имела еси в твоей души, и смирение, и Божественную кротость, веру несумненну, и надежду и любовь, юже к Богу, всенощными молитвами предстоявши Ему, и небесными светлостями, блаженная Софии, озаряема и просвещаема.

Днесь собращая люди хвалами возвеличити Господа, возвеличившаго твое святое торжество: в немже поминай нас, поминающих тя, предстоящи Христу, праведная Софии и всечестная.

Богородичен: Пощади мя, Боже, рождейся от Девы, егда сядеши судити дела моя, и Тоя молитвами презри беззакония и грехи моя, яко Благ и Многомилостив.

Светилен:

Князя утаившися студа, и сего в премудростнем образе показа безумна, жена сущи душею и телом, возсияла еси яко муж разумом и верою, мати Софии, жен праведных украшение.

Слава, и ныне, Богородичен:

День мне возсияй разумнаго веселия, Ты бо еси, Чистая, свет и живот, сущих во тьме: вся бо, аще хоцещи, творити можеши, яко сущи всех Владычица.

На хвалитех стихиры, глас 4:

Священное жилище Богу воздвигла еси, бывши храм Святаго Духа, всемудрая, чистотою душевною, и путеводила еси души к Царствию Небесному, и принесла еси сия, якоже дар Христу, о Софии преславная.

Отроковицы возлюбиша Невестника и Господа, учению твоему покаяющиеся, и плотскую презревше слабость, усердием благочестно страсти победиша, и введошася с тобою, о Софии, в чертог небесный и Божественный, всегда веселящися.

Милость имела еси велию к бедствующим, любовь же истинную к Богу, сего ради благодать Христова в тебе, мати, почила есть, темже твоими молитвами сохрани верою блажация тя.

Рака твоя честная, в нейже почиваеши мощами ныне, источает всем исцеление, верою притекающим к тебе, мати честная и досточудная. Темже твоими молитвами спасай нас, поющих тя.

Слава, глас 8:

О, преславнаго чудесе! Усердно себе Богу предала еси, ниву сердца твоего очистивши от терния душевредных страстей, заповеди Божия исполнила еси, и Творца милостынею умилоствовала еси, сего ради сугубое воздаяние от Бога получила еси, Софии, княгине Богоблаженная, моли Христа Бога даровати нам велию милость.

И ныне, Богородичен:

Архангела Гавриила глас восприимше, рцем: радуйся, Мати Божия, яже Жизнодавца Христа миру рождши.

НА ЛИТУРГИИ

Блаженны от канона, песнь 3-я и 6-я. Прокимен, глас 4: Дивен Бог во святых Своих, Бог Израилев. **Стих: В** церквах благословите Бога Господа от источник Израилев. **Апостол к Галатам, зачало 208. Аллилуиа, глас 1:** Спасение праведных от Господа: **Евангелие от Марка, зачало 21. Причастен:** Радуйтесь, праведнии, о Господе:

Молитва

О, святая праведная мати наша, блаженная княгине Софии, прими милостивно приношение веры, надежды и любви нашей и вознеси е ко Господу, и якоже в земнем животе твоём была еси помощница и заступница всем Православным христианом земли твоея, тако и ныне укрепи нас твердо и непоколебимо до смерти стояти за веру Православную, согрей сердца наша любовью ко Господу и Пречистой Его Матери. Умоли Христа Бога нашего, да сохранит Церковь Свою святую от расколов и ересей, да утвердит в ней дух правыя веры и благочестия, дух ведения и любви, дух мира и радости вечныя, да вся чада ея духом и истиною поклоняются Ему, да укрепит верных в благочестии и святости жизни, да обратит отпадших от Православныя Церкви во святыя недра ея.

О святая мати, града Слуцка похвало и радости, умоли Господа, да избавит град твой и всю страну нашу от глада, труса, потопа, огня, меча, нашествия иноплеменных и междоусобныя брани, от смертоносныя язвы, да низпослет правителем нашим усердие, мудрость и верность, да управляют и судят по воле Его, да хранят установления Святыя Церкви. Испроси всем с верою притекающим к раце святых мощей твоих мирное житие, тишину, просвещение умов и сердец, соблюди их от козней вражиих, от соблазнов мира, во зле лежащаго, и от всякия скорби и нужды, обрати нас к покаянию и исправлению, даруй заблудшим истины познание, недугующим исцеление. Сохрани нас благодатными твоими молитвами от всех врагов видимых и невидимых и избави от всякаго зла, да прославим во вся дни жизни нашей Отца и Сына и Святаго Духа и твое заступление во веки веков. **Аминь.**

http://p2.patriarchia.ru/2013/12/26/1235426531/sluzba_sf.doc